

ikajuttigedluta anginiKatsiavugut.

UKautaujuit Labradorimi Inuit Nunamik Satusaijet AngiKatigegutingani

Labradorimi Inuit Nunamik Satusaijet AngiKatigegutinga (AngiKatigegutik) atitâttaugasuajuk AngajukKânganut Labradorimi Inuit katutjikatigennigani (LIA), AngajukKâsuanganut Newfoundland Labradoriullu, prâvinsimi AngajukKânganut NunaKakKâsimajunik kamajimut, ammalu federal AngajukKânganut Inuligijini. 76%-tet Inuit angnigususimalaukKut Mai 26, 2004-mi, Newfoundland Labradoriullu Illusuanga kajusittisiniattilugu *Labradorimi Inuit Nunamik Satusaijet AngiKatigegutingata Maligatsanganik. Maligatsak* Pimmagittumik Angiutausimaniadluni taitsumanitsainak ullumi. Federal Kângiutittisigiamik pannaigutiKavut ammalu ilijauniattilugu federal Kângiutittisijingita maligatsanginnut.

Ukua uKautaujuit AngiKatigennimi:

Sunagalatuinnait

Una kâpitallik ilumiutaKavuk ilingajunik ilonnânut AngiKatigennimut, ilautillugit Kanuilingausingit AngiKatigenniup, maligatsatigut.

AngiKatigegutik pikKujatsasuaKavuk pijagellagittumik satusaininginnik NunaKakKâsimajuit pivitsanginnik Labradorimi Inuit Canadami ammalu âkKitausimavut pivitsangit Labradorimi Inuit ilitagijauKullugit kajusittitaullutillu allasimajumi 35 *PikKujatsasuangata Maligatsanganik, 1982-mi.* Tautsegiamut pivitsaujunik ikajotitsanillu uKautaujuit AngiKatigennimi, Inuit aittuigiaKavut Canadamik ammalu Newfoundland Labradoriullu kavamangani ilonnainik *nunaKakKâsimajuit* pivitsanginnik silatâni Labradorimi Inuit Nunangita ammalu NunaKakKâsimajuit pivitsanginnik ilingajunik nunaup Kângani pivianattunik Labradorimi Inuit Nunanginni. Labradorimi Inuit tigumiasonguvut ilonnanginnik asinginnik NunaKakKâsimajuit pivitsanginnik Labradorimi Inuit Nunanginni. kajusillutik

NunaKakKâsimajuit pivitsangit ilijauKattaniakKut uKautuummata
AngiKatigennimi ammalu atuttaulutillu piusiugialitigut allatausimanginginni
AngiKatigennimi.

Labradorimi Inuit sakkuingitut ubvalu aittuingitut NunaKakKâsimajuit
pivitsanginnik nunani imanillu uKautaujuni nunalinni taggâni kitâni Quebeciup
ammalu ataKataujunik imanik tâkkunani nunani.

AngiKatigegutik uKautiKangilak pivitsanginnik NunaKakKâsimajuit inuit
Canadami asingita Labradorimi Inuit, ammalu attuiniKagasuangitut
NunaKakKâsimajuit pivitsanginnik asingita NunaKakKâsimajuit inuit
Labradorimi Inuit Satusasimajanginni Nunani.

Labradorimi Inuit Nunangit ilingangilat Allanut kamagillugu tukung
allatausimajuk 91(24) *PikKujatsasuangata Maligatsangani, 1867-mi.*

Canadami Maligatsait Pivitsaujunut ammalu SilakKijagiamut ilingavut Inuit
kavamanganut ammalu pitjutaujunut atâni aulatsiningata, ammalu federal
prâvinsiullu maligatsangit kajusiKattaniakKut atuttaugialet Inunnut malillugu
AngiKatigennik. Pigianningani avittusimajuit Inuit kavamanga
KaujimajauniakKuk Nunatsiavut kavamanganik. Tallimanik Inuit Nunanginni
kavamaKalâkKuk: atautsik atunit tallimani Nunaliujuni Rigolettimi, Makkovik,
KipukKak, Hopedale ammalu Nainimi. AngiKatigegutik kisiani âkKigiattausok
angiKatigeppata pingasuit atitâgisimajuit katimajujuit: Labradorimi Inuit,
kavamanga Canadaup ammalu kavamanga Newfoundland Labradoriullu.

Pigunnaudet IlauKataugunnanellu

AngiKatigennik âkKisisimavuk pigunnautinik maligatsanik ilingajunik kinakkut
ilausongummangâta ikajuttaugutitigut AngiKatigennimi. Maligatsait
kamagijausimavut unuttotillugit Kanuttogijaujuit, ukua imalingatillugit ilangit:

- Inuit ilusituKangit piusituKangillu;
- Inuit kinguvângujut
- tiguannik; ammalu
- nunaKanik iluani, ubvalu atuKattasimaguni, Labradorimi Inuit
Satusajanginni Nunani (Satusattausimajuni Nunani)

Nunalet ilauKataunitsangita katimajingit sakKititaulâkKut
atunnaguijutsautillugit pigiannimik allataugialinnik ikajuttaugutiKagialinnut.
Kanuk nunalet ilauKataujutsaumangâta katimajingit nâmmasingiutinik
âkKisisonguvut ammalu Kanuk nâmmasingijuit kamagijaugiaKavut

maligatsatigut. PivitsaKalippata nâmmasingigiamik, Nunatsiavut kavamanga sakKititsigunnaKuk allaKautinik ilingajunik ilauKataugunnatunut.

Nunait ammalu Asitâttaugunnangit Pivianattuit

AngiKatigennik sakKititsivuk magguilingajunik nunani: Labradorimi Inuit Satusasimajangit Nunait ammalu Labradorimi Inuit Nunangit. Satusattausimajut anginiKavut 72,520 square kilometresinik (28,000 square mailinik) nunani ammalu 48,690 square kilometresinik (18,800 square maillet) imappimi (uKautaujut Nalunaikkutami) ilingatillugit Kaninginilinnut Canadami imappingani. Satusattausimajut Nunait ilautitsivut Labradorimi Inuit Nunanginnik ammalu tallimait Inuit Nunalingit Nainimit, Hopedale, Makkovik, KipukKak ammalu Rigolettimi. Taggânigiak Satusattausimajuni Nunani, 9,600 square kilometresiamaget (3,700 square maillet) nunait sanipvatausimavut sakKititaunitsanginnut Torngait KakKasuanginni Sagvatauppata Nunait. Inuit pivitsaKattitauniattut pimmagittumik tâkkunani nunani.

Iluani Satusattausimajuni Nunani, Inuit namminiKavut 15,800 square kilometresinik (6,100 square mailinik) nunanik ilingajut Labradorimi Inuit Nunanginnut. Tâkkunani nunani Inuit pivitsaKanippavut ammalu ikajuttaugutiKadlutik.

Labradorimi Inuit Nunanginni, Inuit pivitsaKavut sananguagatsanik ujanig pitâsongugiamut, namminigijaummat 3,950 square kilometres (1,525 square maillet) ujanigiatasot ammalu 25 per cent namminigijaudluni nunaup Kângani pivianattuit.

SakKijâgettuit ujanigiatatukattajut tigumiattaujuit Labradorimi Inuit Nunanginni kajusiKattaniattut Labradorimi Inuit nunanginni ujanigiamut maligatsaKattitaullutik kavamanganut Newfoundland Labradoriullu. kinatuinnak Kanuttoguni Kaujisagiamut nunaup Kângani pivianattunik Labradorimi Inuit Nunanginni ullunga atuttaugiasimalittilugu tunitjigiaKavut suligigumajaminik kajusiutitaujutsautillugu kavamanganut Newfoundland Labradoriullu ammalu Nunatsiavut kavamanganut.

SakKijâgettuit nunani Labradorimi Inuit Nunanginni (sollu aullâsimavet ammalu silakKijapvet) kajusiKattaniattut maligatsaminik malillutik. Nutângutitsigumagutik pigunnautiminik ubvalu akunigiamut Kanuttogutik aigiaKavut Nunatsiavut kavamanganut.

Imait kamagijaunitsangit ammalu Inuit Imangita Pivitsangit

Inuit pivitsaKavut atugiamik imanik imminik pigumajaminik ammalu asingitigut Satusattausimajuni Nunani. Nutât pigiasittaugumajut ubvalu sanapvisaugajattut pivalliagamut Labradorimi Inuit Nunanginni pigunnautimik pitâgiaKavut imanik atugumagutik kavamanganit Newfoundland Labradoriullu, kisianilu aittotausongummijuk angittaugutik Nunatsiavut kavamanganut.

kinatuinnak pivallianikkut sanagumaguni Satusattausimajuni Nunani imanik atugumagutik attuiniKagajakKut angininginnik, piujoninginnik ubvalu konninginnik imait nunaup Kângani ubvalu atajunik Labradorimi Inuit Nunanginnut kiani angitiKatigekKâlutik akilittuinikkut angiKatigennimi pilukajuKagajappat angiKatigellutik Nunatsiavut kavamangani.

Imappet Aulataunitsangit

Satusattausimajut Nunait ilautitsivut atajunik imappimi takiniKallutik allatausimajuni Canadaup nunanginni imappini. kinatuinnak sakKititsigasuaguni imappimi aulatsigiamut pannailutik ubvalu pivallianiKagasuappata asitâttaugunnangitunik pivianattunik Allatausimajuni KaujimatitsigiaKavut Nunatsiavut kavamanganik. Inuit attutauniKagajappata ammalu ikajuttaugutingita angiKatigegutinga (IBAs) atuttaugiaKavut angijunik sanagasuappat Allatausimajumi. Angijuit pivalliataugasujut ilauKataujuni, tallimani jârini suliaKaniagutik, ununnisait 150-nit inunnit – jâritigut suliaKattisillutik ubvalu kenaujaliuttisillutik ununnisanik \$40 milion dâlanit.

kenaujatigut Pivallianik

IBAs satusattaugiaKavut akungani Nunatsiavut kavamanganut ammalu pivalliatitsigasuajunut suliatatigut kisianilu pigiasisot Labradorimi Inuit Nunanginni angittausimallutik pigiasikKâgatik Satusattausimajuni Nunani silatâni Labradorimi Inuit Nunanginni.

Nunatsiavut kavamanga aittutaugiaKavuk 25%timik prâvinsiup kavamanganut kenaujanik ilingajunik nunaup Kângani pivianattunut Labradorimi Inuit Nunanginni. Satusattausimajuni Nunani silatâni Labradorimi Inuit Nunanginni, Nunatsiavut kavamanga aittutaugiaKavuk 50 per centimik sivullipânganit \$2 million dâlanit ammalu 5 per centimik asigiallanganik parâvinsimit kenaujanik nunaup Kângani pivianattunit. kenaujait pitâgijaujut nunaup Kângani pivianattunit Satusattausimajuni Nunani silatâni Labradorimi Inuit Nunanginni uKautauKattaniakKut Katsitommangâta, aviukKatauppata adjigettumik akungani ilonnaini

Labradorimi Inunnut, aittutausonguvut kamagillugit jâritigut kenaujaliuttaujuit Labradorimi Inuit adjigettilugit Canadamiuttigut jâri tamât kenaujaliuttaujuni.

Tasiujatsuami Nunait

Nunatsiavut kavamanga aittutauKattaniattuk 5 per centimik kenaujaliuttaujunit nunaup Kângani pivianattunik Tasiujatsuap nunanginni.

Tasiujatsuak ilinganiangituk Labradorimi Inuit Nunanginnut ubvalu ilauKataulluni Satusattausimajunut Nunanut. Taimaigaluattilugu, unuttuit kâpitallet AngiKatigegutimmi ilingavut Tasiujatsuamut sollu nunautillugu Satusattausimajutit Nunattit. Nunait Tasiujatsuami angnigijaugajakKut Labradorimi Inuit Nunangiutillugit ubvalu ilaullutik Satusattausimajunut Nunanut suliaKajuit matuttaupata, tamakkua piusiugumajut kamagijaugiaKalâkKut angiKatigennikut sakKijâgettutigut Innu Nationikuttigut.

IBA akungani Labradorimi Inuit ammalu pivalliatitsijet Tasiujatsuami atuttaugiaKavut. Tâna IBA atutsiasimalimmat ammalu atunniKatsiavuk.

Newfoundland Labradorilu ammalu Canada uKasimajut KaujimatitsiKattaniattut Nunatsiavut kavamanganik pitâjuKagiaKalippat pigunnautimik ilingajunik suliansanut. Atuttauluaniattut Kaujimatitsinikkut Avatet Aulatsijingita AngajukKauKatigenginnut, tamannalu sakKititausimaligekKuk.

Nunait Sagvatausimajut ammalu Paigijaugialet Nunait

Torngait KakKasuanginni Nunait Sagvatausimajuit sakKititaulâkKut ullunga atuttaugiasilippat AngiKatigenniup. Sagvatausimajuni Attuinik ammalu lkajuttaugutitigut AngiKatigennimi satusattausimavuk ilingatillugu Torngait KakKasuangita Nunanginni Sagvatausimajunut ammalu atuttaugiasilâkKuk taitsumanitsainak AngiKatigennimi. Newfoundland Labradorilu ammalu Canada satusaisimavut Nunait AittotigijaukKullugit AngiKatigennimi, pivitsaKattisijut aittuigiamik Canada prâvinsimi kavamanga nunanik pigiaKagutik sakKititsigiamut Torngait KakKasuanginni Sagvataugumajunik Nunanik.

Nunatsiavut kavamanga sakKititsigunnaKuk asinginnik paitsigiamut nunaujunik Labradorimi Inuit Nunanginni.

Asingit nutât paigijaugialet nunait Satusattausimajuni Nunani silatâni Labradorimi Inuit Nunanginni attuiniKagajakKut pivitsanginnik Labradorimi

Inuit atâni AngiKatigenniup, pijagettausimagiaKavuk paigijaunitsangit nunait angiKatigennimi Nunatsiavut kavamangani.

Nunait Atuttaugiamut Pannaitauningit

Iluingailutik nunanik atugiamik pannaivut Satusattausimajuni Nunani pivallialutik ikajuttigellutik kavamanga Newfoundland Labradoriullu ammalu Nunatsiavut kavamanga pingasuni jârini ullusanga atuttaugiasinninganut AngiKatigenniup. Nunatsiavut kavamanga kajusititsigiaKavuk nunait atuttaunitsanginnut pannailutik ilingammata Satusattausimajunut Nunanut silatâni Labradorimi Inuit Nunanginni. Angittautuappata ilonnatik nutât pivallianiugasuajut maligiaKavut pannaigutimmik.

Avatet kamagijaunitsangit

Federal ammalu prâvinsimi avatinik kamajingita maligatsangit atuttauKattaniakKut ilonnâni Satusattausimajuni Nunani. Nunatsiavut kavamanga maligatsaliusongummijuk kamagillugit avatet kamagijaugiaKaningit suliatatigut Labradorimi Inuit Nunanginni, tâvatuak federal ammalu prâvinsiup maligatsangit atuttauKattaniattut akiniagutijukalippat akungani maligatsait. Tamanna ilingavut Inuit Maligatsangit atuttaugiaKammata ubvalu sâlaKallutik ullumi atuttauKattajunik maligatsanik ammalu pivalliagasuajuit angittausimagiaKavut ilonnainit pingasojunit kavamanit pigiasikKâgatik suliataminik Labradorimi Inuit Nunanginni.

AngiKatigegiaKavut katimajijuit piggagasuallutik avatet kamagijautsiagiaKaninginnut piujumik pilukâttailillutik nâmmangitunillu.

Omajuit Piguttuulu

Labradorimi Inuit pivitsaKavut piuliukKaigiamik omajunik piguttunillu Inuit niKinginnik, ilonnâgut ammalu ullusiugutitsanik ilonnâni Satusattausimajuni Nunani. AsikKitailigiaKappata piuliukKainikkut Labradorimi Inuit pigialimminik kisiani pigiaKalâkKut âkKitausimajutigut prâvinsimut ubvalu federal angajukKânganut, kamagillugit pikKujauguset Nunatsiavut kavamangani.

AulatsiKatigennimut angajukKauKatiget tilijaugiaKavut kavamanganut Newfoundland Labradoriullu, kavamanganut Canadaup ammalu Nunatsiavut kavamanganut asikKitailigiamut aulatsigiamullu omajunik piguttunillu Satusattausimajuni Nunani. Prâvinsiup ammalu federal kavamanga ilonnainik kamaKattaniakKok asikKitailigiamut aulatsigiamullu omajunik piguttunillu Satusattausimajuni Nunani.

kisiani taikkua Kanuttojuut tigumiajut aulatsigiamut atâni AngiKatigenniup, Nunatsiavut kavamanga aulatsiKattaniakKuk kinakkut piuliukKaigumammangâta omajunik piguttunillu iluani Labradorimi Inuit Nunanginni. Allatausimajuit ilingattitavut inongitunut sakKijâgemmata aullâsimavingit Labradorimi Inuit Nunanginni piuliukKaigiamut nunani atuinnaKattatanginni ammalu ullumi atujanginni. Ammalu, inongituit Labradorimiut piuliukKaisonguvut tinittajuni imani aullaigatsautinnagit pisongullutik akuniungitullu aullâsimaviKasongullutik ammalu Kijuttasonguvut sitjaup killinginni Labradorimi Inuit Nunanginni. Nunatsiavut kavamanga aulatsiKattaniakKuk piuliukKaigiamik niKitsanik, ilonnâgut ammalu ullusiugutitsanik atuttaugatsanik ilonnâni Satusattausimajuni Nunani.

SakKijâgettuit silakKijapvet illuit ammalu sâttujâliupvet kajusiKattaniattut ingigalutik malillutik maligatsaminik. Nunatsiavut kavamanga ilonnâgut pivitsaKavut angisongugiamik nutânik silakKijapvisanik ammalu sâttujâliupvisanik Labradorimi Inuit Nunanginni ammalu sivullipauullutik sakKititsigunnaKut nutânik aulataugialinnik ilonnâni Satusattausimajuni Nunani.

Ogait

Labradorimi Inuit pivitsaKattitauniakKut oganniagiamik ammalu imappini omajunik niKitsautillugit, ilonnâgut ammalu ullusiugutitsautillugit ilonnâni Satusattausimajuni Nunani. AsikKitailigiaKappata ogannianikkut Inuit pigialinginnik aittutauKattaniattut, pigialingit âkKitauKattalutik federal angajukKânganut kamagillugit uKautjigiagutaujuut Nunatsiavut kavamanganut.

AulatsiKatiget angajukKauKatigetsangit tilijaulâkKut kavamanganut Canadaup, kavamanganut Newfoundland Labradoriullu, ammalu Nunatsiavut kavamanganut sakKititaullutik katingajiujuutsautillugit uKautjigijaiullutik kavamanut pitjutigillugit asikKitailinik aulatsigiamullu oganik Satusattausimajuni Nunani. Prâvinsi ammalu federal kavamanga ilonnainik aulatsiKattaniakKok asikKitailigiamut aulatsigiamullu oganniagaujunik Satusattausimajuni Nunani.

SakKijâgettuit oganniagiamut laisinsingit attutauniKaniangitut AngiKatigenniimi. Inuit aittutauKattaniattut percentinganik nutâp ubvalu ilagiattaullutik oganniagatsangita laisinsinginnik uKautauullutik sunanik oganniasongummangâta iluani Nalunaikkutait imanginni atajuni Nalunaikkutanut.

Labradorimi Inuit aulatsiKattaniakKut oganniagumajunik ubvalu sakKititsilutik imâni piKutinik atuttaugialinnik Labradorimi Inuit Nunanginni ammalu

sivullipaullutik pivitsKattitaullutik sakKititsigiamik imâni piKutinik atuttausonik Satusattausimajuni Nunani.

NiKitsanik Asiujiititausimanimmutt Akiliutitsait

Pivalliagumajuit suliaKagumajut Labradorimi Inuit Nunanginni ammalu angijuit pivalliatuujuit Satusattausimajuni Nunani silatâni Labradorimi Inuit Nunanginni kamatsiamagigiaKammagikKut piungilititsipata suliaKallutik omajuit ubvalu ogait sujuttaupata kamagijaugiaKavut asiujiititaugutik akilittaugiaKavut Inuit sukkutauninginnut ubvalu asiujiippata omajunik, oganik, omajujanik ubvalu ogait ininginni pivallianikkut sujuippata suliansangitigut.

Itsasuanitait

Nunatsiavut kavamanga aittuisonguvuk pigunnautimmik itsasuanitaligigiamut Labradorimi Inuit Nunanginni ammalu Inuit Nunanginni, federal kavamanga pivitsaKattisiKattaniakKut aulatsigiamut itsasuanitanik federal nunanginni Satusattausimajuni Nunani, ammalu prâvinsiup kavamanga aittuisongutillugu itsasuanitaligigiamut ilonnaini nunani Satusattausimajuni nunani.

Nunatsiavut kavamanga, kavamanga Newfoundland Labradoriullu, ammalu kavamanga Canadaup maligatsatigut aulatsivut Labradorimi Inuit Nunanginnik ammalu Inuit Nunanginnik paitsigiamut itsasuanitait nunanginnik, piKutivininnik, ilusituKait piKutinginnik ammalu Inuit iluvinginnik. AkiniagutijuKappat, federaliugaluappat, prâvinsiugaluappat ubvalu Nunatsiavut kavamangata maligatsanga atuttaugiaKavuk kamagillugit sunait pitjutaummangâta. PiKutivnet nagvâtaujuut Labradorimi Inuit Nunanginni namminigijauniakKut Nunatsiavut kavamanganut. PiKutivinet nagvâtaujuut Satusattausimajuni Nunani silatâni Labradorimi Inuit Nunanginni ikajuttigellutik namminiKaniakKut Nunatsiavut kavamanga ammalu kavamanga Newfoundland Labradoriullu. Itsasuanitait nagvâtaujuut nunani atâni aulataujuni ammalu aulatsijinganut Canadami ikajuttigellutik namminigijauniakKut Nunatsiavut kavamanganut ammalu Canadaup kavamanganut.

Itsasuanitaligijet maligiaKavut nunalet pusiukKujanginnik.

Nunait Atingit

Nunatsiavut kavamanga ilonnâgut pivitsaKaniakKuk sakKititsigiamik nunait atinginnik Labradorimi Inuit Nunanginni, angittausimallutik kamajujumut prâvinsimi angajukKânganut. kavamanga Newfoundland Labradoriullu KaujimatitsigiaKavuk Nunatsiavut kavamanganik sunait atittâtaugiasippata nunait Satusattausimajuni Nunani silatâni Labradorimi Inuit Nunanginni.

Labradorimi Inuit Namminik kavamanga

Labradorimi Inuit âkKisuisimavut imminik PikKujatsasuuminik sakKititsijuk maggonik kavamânni: Nunatsiavut kavamanga, aulatsiKatautillugit Inuit avittusimajutigut, ammalu tallimait Inuit Nunalinni kavamangit. PikKujatsasuak sakKititsivuk Inuit Nunalet kuapanginnik ilingajunik Inunnut iniKajunut Upper Lake Melville Nunalinni ammalu asinginni silatâni Labradorimi Inuit Satusasimajanginni Nunani. Ilonnatik kavamait maligatsatigut aulatsiKattaniakKut. PikKujatsasuak atuttaugiasilâttuk AngiKatigennimi.

Nunatsiavut kavamanga maligatsaliusonguvuk aulataunitsanginnut Inuit nunalet Labradorimi Inuit Nunanginni ammalu Inuit Nunanginni sollu pitjutigillugit ilinnianet, sukkutailinik, suguset ilagellu kamagijaunitsangit, ammalu pigunnangituit ikajuttaunitsangit. Nunatsiavut kavamanga aulatsiKattaniagivuk ilonnainik iluani kamagijaugialinnik, Inuit uKausinginnik ilusituKanginnilu, aulataunitsangit Inuit pivitsangit ammalu ikajuttaugutingit atâni AngiKatigenniup. Nunatsiavut kavamanga sakKititsigunnaKuk maligatsanik aulatsigiamut Inuit maligatsanginnik.

Inuit Nunalinni kavamangit ininginnoniakKut nunalet kaunsalinginnut. Inuit ammalu inongittut nunalet Inuit Nunanginni angnigususonguvut ammalu kiggatusongullutik kaunsalini Inuit Nunalet kavamanginni. Inuit Nunalet kavamangit maligatsaliusonguvut kamagillugit nunalinni ubvalu kaunsalet kamagiKattajanginnik iluani Inuit Nunalinginni.

kenaujatigut AngiKatigennik

Labradorimi Inuit kajusiKattaniakKut ilauKataugunnalutik pitâgiamik kavamanganit Canadaup ammalu Nunatsiavut kavamanganit satusaiKatigennikut kenaujait angiKatigegutinganik tallimait jâret Kângippata kenaujaKattisillutik Nunatsiavut kavamanganik ilingajunik angiKatigennimut suliatsanik ikajuttaugutinillu Inunnut ammalu, nâmmasiappat, asinginnut nunalinnut. Inuit akilegiaKaKattaniakKut akilittaugialinnik namminik aulatsinimmut, suliatsanut ammalu ikajuttaugutinut.

Sivullipâk kenaujatigut angiKatigegutik satusattausimavuk ammalu atuttaugiasilâkKut AngiKatigegutik atuttaugiasippat.

kenaujait Tunijaunitsangit

kavamanga Canadaup akilegiaKavuk Labradorimi Inunnik \$140 million dâlatut 1997-mi dâlausimajunik, malillugu allatausimajut akilegiamut 15-ni jârini. Inuit utittisigiaKavut satusaidlutik tautilitsasiavinimminik 15-ni jâriusimajuni atusimajaminik.

Tâkset

Labradorimi Inuit kajusigiaKavut atullutik federal ammalu prâvinsiup tâksinik akiligialinginnik. Nunatsiavut kavamanga maligatsaliugajakKut kamagillugit tâkset akilittaugiaKaKattajut Inunnut Nunatsiavut kavamangani ammalu maligatsaliullutik aulatsiKatigennimut nâmmagijautsiajunillu Inuit Nunalingita kavamanginnut tâksiligijinut. Asigiallangit pitsatunitsangit Inuit kavamangita tâksiligijet inuit asingit Inuit satusaiKatigegiaKavut angiKatigennikut akungani Inuit kavamangita ammalu federal ammalu prâvinsiup kavamanginni.

Nâmmasingijunut PikKujaliak

Pingasuilngajuit idluatsaijuit silatinginni akiniagutigiamut pikKujalianga sakKititaugiaKavuk. kamajutsautillugu akiniagutijunik pitjutigillugit uKautauningit AngiKatigennimi ammalu nâmmasingijuKappat pitjutigillugit pikKujaliat AngiKatigennimi. Ottotigillugit nâmmasingiutaujuit âkKiutausot sollu satusainikkut nâmmasingijunik sollu omajuit sujuttausimaninginnut akilittaugialet, maligatsangit IBA silatinginni Labradorimi Inuit Nunanginni ammalu maligatsait kavamani ilingavut Labradorimi Inuit Nunanginni pitjutigillugit pigunnaudet atâni AngiKatigenniup.

Kângiutittitauninga AngiKatigennik

Kângiutittisijet katimajet sakKititaulaukKut kamajutsautillugit Inuit Angnigusuttet AtiKautinganik ammalu aulatsijutsautillugit Inuit Kângiutittisininginni angnigusunniku.

AngiKatigegutik KângiutittitaulaukKut 76.4 percentingit allatausimajuit Inuit angnigusutillugit angnigusunniKatillugu Mai 26, 2004-mi.

December 6, 2004-mi, Newfoundland Labradoriullu kavamangani Illusuanga KângiutittisilaukKuk AngiKatigegutimmik kajusittitautillugu *Labradorimi Inuit Nunamik Satusajet AngiKatigegutingata Maligatsanga. Maligatsak* Ullusiugutauniattillugu taitsumanitsainik ullumi.

Labradorimi Inuit katutjiKatigenninga, kavamanga Canadaup ammalu kavamanga Newfoundland Labradoriullu atitâgilaukKut AngiKatigegutimmik Januar 21, 2005-mi.

Federal Kângiutittisinitsanga kajusilâkKuk atuinnaulippata ilitatsitsilutillu federal Kângiutittisigiamut maligatsanganik.

AngiKatigegutik atuttaugiasilâkKuk ullungani uKautauppat kavamanut.

Pitsatunittâsinik

Pitsatunittâsigiamut pannaivuk ullusanganik, kamagijaugialinnik ammalu akitsanganik pitsatunittâsigiamut AngiKatigegutimmik satusattausimajumik.

kavamanga Canadaup aittuilâkKuk \$156 million dâlanik Nunatsiavut kavamanganut pitsatunittâgianga AngiKatigegutik. Tautselutik pitsatunittâgiagamut kenaujanik, Inuit sakKititsiniallutik kavamanganit Canadaup sivunitsatini kenaujanik atuttaugatsanik, kisimi ilangit asingit uKautauppata atuttaugiaKangituit kenaujait allatausimajut AngiKatigennimi.

ÂkKIGIATTAUSOT Januar 12, 2005